

樂靜先生集三



卷第十

上孫莘

上孫莘老采先人埋銘

上顏朝奉

上眉陽先生

月日謹齋潔裁書馳獻于眉陽先生閣下記為童
時先生父子兄弟一旦出岷峨四方士大夫稱誦其



文曰有宋已來未嘗見此文也至採拾先生父子兄弟所著書人人為長編大軸手自操札較其所得多少以相輕重其是時嘗得其本於親家雖未能深達義趣讀之反覆不知所以不能廢後數年偶友人晁補之自新城侍親歸云辱在先生門下雖疾風苦雨晨起夜半有所請質必待見先生而後去先生亦與之優游講析不記寢食必意盡而後止晁君氣豪邁辨博俊敏下筆輒數千言行餘卓犖馳肆掣斂各盡其妙嘗曰此文蘇公謂某如此作此文某所作蘇公以為然者也又數年先生罷東武還朝晁君見先生

於京師既歸昏夜扣門開軒置燭出先生新文十餘篇促席吟誦晁君健辭氣每道先生言語至險絕處口吃如不快意須臾風雨暴落息撼燭滅感忽之間疑有神物二人者獨把卷躡嚙恍然不知心形之俱忘也某與晁君少同學而蔭差長自知議論智識遠不及而彼獨聞道於賢先生頽顏熱中憤悱交作不幸頻年已來憂患摧鑠身窮而志感坐則面墻舉頭則碍屋慨然思遊四方趨走于賢士大夫之門少起其衰墮秋底之氣然而賤迹囚纍觸事乖闕猶區區收拾古人腐餘綴為文詞出應有司而輒玷一第得

官於徐徐先生舊治也風迹未遠門生故吏多出庠
序而半在官府每相過者論先生德義誦先生文章
堂上琅琅終日不絕某獲代者舒堯文也堯文辱先
生深知把酒揮墨登臨嘯歌無日不相尋言先生與
人交畧去崖角洞見肺腑恐其不親已人亦自忘其
鄙外而不知所以化一日登黃樓曰此蘇公燕集之
地也酒後喜為文章盡篋中無留紙如方盤大斛寫
出珠貝照爛磊落鑠手奮目衆人排擠爭先取之惟
恐其攫之不多也是時晚風落日遠山逶迤川流無
波白鳥上下不竊思昔年席上之樂徘徊俯仰歆慕
能蓋中心眷焉者不獨在夫山水一時之覽也某與
堯文仕宦同而堯文辱先生之遊最久物我未忘每
自慚恨未幾王子中秀才以書見投出新文五篇愛
其器質深重擺去俗習不類科舉文字乃知先生弟
子由壻也某切不自度扣以先生動止則曰蘇公在
齊安掩閤著書俯仰一室淡然自足如巖居隱士之
行與世相遺少無謫官意嗚呼事不難無以知君子
歲寒然後知松栢之後凋古之聖賢安居無事脩身
誠心者必期至於此而後信今斯人也某何得預聞
焉故某昔之所謂憤悱慚恨者皆不留於心而惟知

感動慨歎夜不卧寐自謂終身所脩何為而及此也
某蹤跡之賤未嘗聞於執事之前而出處違忤不得
一拜道德之免所幸傳先生之詳者皆出於先生交
從新舊之間而得之尤多然而問魯人以泰山其言
如是而高如是而大已載於目前矣至于雲烟蔽虧
氣象明晦日麗雨潔春濃秋瘠變態無窮雖魯人有
不能道者要須屏心注目躊躇終年而後能盡也天
聰不遠人意相望朝廷一旦以詔起先生而位在公
相不肖方謀為祿仕南北未定不知何時得造門下
區區所懷輒爾陳叙窮冬苦寒惟乞為道自重不宣

上蘇黃門

月日具位某謹齋心伏形裁書寄獻於筠州宣德先
生閣下某成童時已聞先生文章道德光耀震發驚
撼天下耳目于今二十年公卿大夫閭巷之士講服
傳道者嘗竊聞之矣自以賢不肖尊賤勢不相及復
至出處乖隔無緣趨伏門下譬猶景星一出高者先
見三尺之童行於稠人廣市之中欲引頸而望光彩
未可得也守官東徐數月先生之壻王子中惠然肯
顧不以不肖無可與語寓學舍幾一年數道先生議
論風趣熟於日前者稍獲銘誦日夜感躍如窮之頗

久饑之人乍食梁肉縱未得大嚼聊使染指搶鼻亦足自慰幸甚幸甚後於王子中處得先生筠州東軒記讀之其意欲歸伏田里追求顏氏之樂又於高郵先生處得棲賢法堂記讀之以謂士苟一日聞道則死無餘事未幾黃州先生以書見復云舍弟子由學道三十年今粗始聞道考其言行信與昔有間矣某獲是三說敬拜避席歛容以思雖未能造先生之門上其堂而窺其室正猶牧羊之子方散亂失筮於多岐之間行大道者忽出手而一招之也嗚呼士之困於俗習易已逐物頽靡不反失其本心而不知學道之可樂者久矣非高明君子篤好而特立以振擢其昏憊欲死之質則聖人之門何賴焉此天下想望先生風彩者非獨某一人也薄祿所縻未能脫然以去屈膝請教於下風而願為洒掃之列不勝慚恨伏乞為道自重下慰士望不宣再拜

上莘孫老

月日具位某謹百拜獻書于留守先生几下某應舉時金陵荆公初在政府四方士大夫望風而來者戶外滿屨堂上滿席得荆公一言則公卿為之改容得二言則天子置之高位當時士大夫待荆公而進退

不知幾何人也後荆公之罷政平日為之倒履屣足
席者稍去而從他門毀短排陷訛百出雖市道不
若也由此觀之前日之來逕為勢利爾今天下與
語荆公道德同器識均趣舍之迹獨不負於終始之
義特先生一人爾此天下有知之士歸先生宜如何
矣某天與遭遇幸先生來守徐憫其可教不忍弃之
汙賤樂與之進三沐而三薰之日夜感勵不知所使
而心中區區有欲傾寫于左右拘以屬吏不能豁然
自道者久矣某生質卑近所見多昧性復緩闊不急
於事每聞時人議論謂貧賤可耻富貴可致如夢睡

中聽人語天上事爾雖略省心獨不知其可到也見
一二輩纒入仕宦逕得美官柔声怡色惟恐不當人
意如觀木偶人戲伸眉俛首舉動不自持但竊笑其
機索使然爾某家本儒素先人在仕三十年終有田
數頃子弟閉閤讀書未嘗若生事先人弃養既終喪
私故敦逼弟兄奔走四方汲汲乎祿仕不肖守官於
此獨無他責俯仰一室黃卷中日與聖賢對為吏之
樂莫甚此職但人生多事薄宦去來正如逆旅爾恐
未能盡如今日之優游也自少強聒笑人親俗事喜
就書史雖不能多記誦古人趣向粗覽大槩平生藝

習書射音奕略無所好一讀古文輒終日不厭遇事
感激聊復自賦雖組織非工要隨意遺適此二者縱
使窮老愁餓決知其不能廢若夫形骸之外非志所
願而力不足者久已忘之矣仲尼曰四十五十而無
聞焉斯亦不足畏也已自惟蒞壯子長去四十之年
如數朝暮脩身行已治性養心之効曾未及古人之
一二而忽々將老此寤寐憂懼深自痛恨者也不幸
事先生纔數月僅孰於声兒而先生移鎮留府官責
所拘不獲追隨杖几豈復天使之終愚乎伏承使旌
戒道有日謹齋心服形三日不外視敬拜坐未願終
下之遊沒蒞知幸不宣某再拜

上孫莘老求先人埋銘書

具位某今日謹齋潔裁書西鄉再拜獻于祕監學
士先生閣下某嘗謂天下之情有欲於中者不能無
求於外其求之也或樂而與之或拒而不應蓋求之
則一而所求之者二也以利求人者戛於世俗之所
必爭宜拒而不應也以義求人者合於君子之公好
宜樂而與之也某今日之求正為義爾此所以內省
而無疑直往而不惧特有望於左右爾先君在仕四

十年信道守義端重靜肅不作苟見不治苟得不趨俗不干譽世之所謂貧富貴賤寵辱利害者未嘗撓拂其心進退去就之際漠如也故見利則知畏未衰而早休安其志而已挾此之志以遊乎世其為人深知之也固寡矣雖然在先君言之志不願知于人則可在人子之心不能明先君之志以貽子孫以聞後世則罪也使有勢位者明之耶則不敢累其心使善辭說者明之邪則不敢誣其實必求諸有道嚴正君子而已恭惟祕監學士先生道足以信萬世行足以服天下取捨以公議論不妄後生學士潔已以矜仰

王公大人悚心而畏屈非獨不肖所受教也今得先生一言以銘先人壙中使其志足以貽子孫聞後世不泯於寂寥茫昧之中則人子之情沒齒不忘伏祈先生憂恤之幸甚自惟不肖嚴事先生視之幸甚在上以父也先生所以教育不肖視之以子也事人以父者必如其父而不欺教人以子者必如其子而不外此區々之心尤恃其必獲也俯伏聽命下情無任傍徨激切之至不備

上顏朝奉

某啟前日嘗辱賜手書曲示存恤屬私事未定尋失

裁報獲罪多矣先生弃養十年門緒衣墜兄弟仕宦
粗知所立手足相助日望起家先兄最孝睦行已端
肅有古人法度不獨兄弟所愛敬鄉人尤樂親之年
方四十三官至一尉平生所志未及開發一二遽爾
摧謝天罰何大酷邪二子雖已勝衣可以奉後而田
園廬舍久廢不治其中春湏暫謀歸計使孤嫠稍安
然後復還願未得罷去為恨伏聞子由先生遇彼數
年之別一日會遇相與解斥世故講其學道之妙此
賢者所樂也不肖安得與之志氣所同必見於酬唱
使一咀餘味猶不陷溺於小人乃所願也中年多難
觸事氣喪兩鬢蕭然輒已半白自悔少時務學鮮淺
不求深趣區區所聞正在膚革今日思之大是謬悠
爾此所以急聞救藥也見諭子由先生云箎子中有
佛書精要處此亦無可恠但至理無二言會於理便
為實際井巷常談出于鄙夫鄙婦有與聖人合者理
不外是故也鬼谷韓非之書推本道德時近玄者二
子安足知老子哉其言適中爾箎氏之時固未聞有
佛縱有之亦不為佛觀其書者喻其理可矣安在學
所問耶昔人有談不死者或從而學之未及門而其
人已死猶恨其學之不早或曰自謂不死而其人已

死乃誣也奚恨曰彼雖死安知其無不死之術正如
筦氏未知佛而其言有似之也先生以謂如何勝人
來得雜錄一卷寫畢歸左右巽臺記更一二日可模
單代東園記方謀錄刻此月未必得馳上新著必多
願無吝貶教春温不雨惟冀節宣自後不宣

樂靜先生李公文集卷第十

樂靜先生李公文集卷第十一

書五

鉅野李昭玘字成季

上鄆州安撫劉莘老相公書

荅劉秀才求先博士墓誌書

代賀方回上李邦直書

代賀方回請見書

代四兄求薦舉書

上鄆州安撫劉莘老相公書

某惶恐頓首百拜上某官閣下某元豐間作舉子同
相公二令息登進士科後一歲復與今管城令偕除

學官是時方執子弟之禮請謁左右相公亦以禮進而不拒也聽言侍坐茫然如循大海之涯莫能窺測一二退以自許以謂寒鄉晚進望大人先生名德之重一造其門以得見為幸元祐初詔試入館相公位既顯德業益著天下之士奔走望風摩轂而至皆一時之豪傑相公坐政事堂為天子調緝百度道迎太平塞天下之觀望以得失為輕重外則為朝廷考觀人才內則相與講論經世之具相公固不輕于與人士之吐奇畫策者亦平日感慨自負不疑于有為也自惟涉道甚淺聞見鄙野氣孱志狹一無所長乘馬

從徒陪三館之士出入掖門塵埃風雨破帽自障蹌踉俯俛日復一日頷左右虎士如有愧色區區亦莫知其何為也同列之間俊異朋合吐辭論事伸眉抵掌方使雄向挾鞞賈馬執鞭其後相與並驅周旋每坐其間不敢據席面熱氣弗竟不能語闌々如屋上鷓惟恐其彈射之將至也退而治事則磨丹和鉛鐫補字畫一見蠹虫則惡而殺之獨不知無功而祿坐官舍食太倉黑頭利喙便腹蠢蠕月費三萬錢亦書林之一蠹也當此之時便有投劾而去暇振衣彈冠趨走王公之庭哉夫犯分而進不若知守而退使人

可賤不若以賤自安往時雖數月未嘗一走門下者
其志亦如此而已如某等輩雖百數十必無補於盛
德之萬一猶能退自屏縮以冒昧為罪亦於相公進
賢退不肖之道有助焉爾苟為不知此三日一謁五
日一拜縱不蒙箕倨而慢罵亦門下之罪人也京居
累年職事既非所安又迫以貧病求去甚懇累月未
報猶以筵撞鐘幸其鏜然以應固不可得也伏蒙相
公造物無間與之曲成憐其無用之愚一言埏鎔獲
遂所請被命奔迫東裝東歸洒掃弊庐上先人家墓
哭兄長於室問勞孤嫠飲食挨子弟私願既畢徑趨

官期度白馬之橫流覽鄴都之頽址浮清漳探滏口
弔黎人之墟訪赤狄之祀如歷階升天底于上黨其
地襟以三閔帶以汾沁七國之時為韓邊邑趙魏倚
以障秦而相為鴈行秦不破韓不敢循東山而下開
元以來連洛六州為一大鎮騎太行之脊前扼幽并
旁蹙鎮定當四塞之衝屹為完城亦形勢之國也其
俗儉嗇固陋克於自守爾我不相易故急衣食而緩
節義重財賄而薄婚姻地高氣寒故堅忍而壽陵阜
多川澤少故有餘於力而不足於智雖強聒難今而
無推牛發冢群行剽劫之患斯有取焉爾上自秦漢

下及五代阮趙卒封馮亭直盜兵之寃翦鳴辰之禍
夾城之圍三垂之戰遺蹤舊事歷々可按一來於此
年穀既豐民訟希濶飽食而日有餘力山經水志斷
碑遺史田野老人之語究其本末足以增益所未聞
登高望遠山川氣象負抱回合感事賦詩足以泄其
羈旅之思不知為吏之勞而有宦學之樂此皆相公
前日之學也幸甚幸甚日夜奮勵未知所報雖然士
之為志也致一而已是非可否重輕利害衡之于心
而照之以道無待於人々亦何與於我也要之不辱
於終身之義自信其所為而不苟挺然中立不倚於

物而姑從吾所好其為窮達用捨則有命焉爾如某
之說雖相公之自處者猶若是也以身任國事宰平
天下裁量斟酌合千萬人之情同不齊之口愛憎毀
譽動盪排觸紛々藉々特未定也日使百手百喙撫
籍解釋必不能平惟相公應之不撓使物自為輕重
去就而不相薄者為能洗濯其心一以待之而已士
之與王公雖貴賤異勢苟為學先王之道要其自得
之志未嘗遠也汶為東藩非勲德之盛無以壯京師
而鎮方回股肱勤劳暫爾分逸西歸之召正在朝夕
伏冀為時貴生還踐鼎席宗社永賴天下蒙福某官

守拘隔未由叅侍台座下情無任傾依激切之至不
宣某皇恐頓首再拜上

荅劉秀才求先博士墓誌書

博士劉孝嗣也

某再拜伏蒙遣人寄示先博士行狀委之誌銘伏讀
反覆泫然墮淚哽塞終日恭惟先博士文章議論器
業風節卓然盡在人上士大夫知其名者莫不嘆息
追憤願為之載迷而猥先不肖理亦疑為自念與先博
士元豐初擢進士第名列奏籍有同聲之舊元符間
攝事南都因緣聚首把酒笑語傾露肺腑情義款熟
復為同好之友古之人既曰故舊朋友凡有以赴患

難託子孫者皆受之無拒不幸且死俾之書數百言
納諸壙中以信後世乃餘事爾來使惠然必以此也
幸甚幸甚某不敏輒逡巡再拜以辭固有說也某杜
門屏處十餘年中間禍患摧併哭泣之哀相踵者七
八志慮凋耗餘息僅屬忽々如迷人未嘗涉書史窺
古人制作之意筆硯塵涸覆弃地上不復收拾逮今
事往痛定過意少適欲為小詩陶寫性經情營終日
不能成章間得一二句瑣俗淺惡正如劇兒行歌乞
人擊節之語竊自鄙笑亦復慚恨竟與敗帚弊屣投
之糞壤示不更作行年幾七十百事乍廢每遇天日

暄和藉管擁絮坐墻下暴背摩腹氣血俱融頽然一
寐此日用也其它種々現前不復經意若夫枯腸索
竒字嚼齒造健語蓬頭搔鬢其色焦然徼倖於世俗
牙頰之間固不暇也此某所以當辭而左右者不得
不聽某之辭也必欲強其所不能使某不得以不能
自免則一切荒浪顛倒苟塞來諭一聞於人百手指
笑足下方以顯親為孝而無以慰其心某之玷負先
德亦不克終故舊朋友之義非所安也昔柳子厚死
皇甫持正為文哀之知子厚者止如此而已韓退之
為誌其事辨說明偉信非常人所能知者先茫一出
千古不滅言足以發之故也足下欲以此意見屬實
非所敢當必求諸能者毋勤來使幸甚某再拜

代賀方回上李邦直書

伏念犬馬之齒既壯且老望門下之日不為不久方
未冠時碌々無所知識閣下應直言詔斬然起北州
策天下利害於天子之庭卓々皆經濟大務傳之四
方士大夫誦其言想見其人者摩轂而至某自量何
如人不敢奉洒掃以從衆人之後竊以為慚後數年
迫于致養遽從一官監門管庫義苟不辱坐則如窘
木索動則與輿皂等勤一忤上官訶詆隨至且虞誅

責之不可脫則無以事親畜妻子故垂頭塞耳氣息奄奄岷然自奮之心日已微矣閣下位益顯名德日重一旦叅頂大政門下之客皆一時豪傑而其之貧賤猥陋不改如平日縱能操尺紙之謁勝行下風門闌輿謁之吏一覘其姓名已偃蹇不問左右青紫睨睨耳語不恠則笑雖某之心亦不能自信也故又遂巡中輟某嘗思古之王公鉅人出則之名世不幸不同其時不可復見時雖同而老死窮僻終身不得而見之者皆命也可以往見矣言不足以自媒力不足少自舉欲行而如有挽之者而又慶為疑亦有命爾

然以謂或出於人事之不齊者猶未志也北江外代歸閣下方出鎮咸陽距京師二千里堂上之老不可去須臾升斗之祿井旨不足蓋未能贏三月之糧蹇裳以往也今則調官衡陽將浮汴達淮涉江漢絕沅湘萬一有逃於風波之患而長沙之南地苦卑濕背騷人逐客悲吟歎息不自聊生非北州之士所能安也而又母老妻病子弱身復多疾一月之間飽食井卧者不過數日方且日夕促々以鼓鑄為事金錫之氣薰灼腸胃叫呼咄咄驅策吏卒以赴其員程此賤者之事非敢辭也自惟平生多艱小有所須動不諧

遠百步十躡一食三噎又安能必後日之志哉所幸
守官彭門辱與公子有一日之雅今輒以悃幅自託
繕寫所為惡詩若干篇上獻台座排歌諧語之比試
以閱之幸其若夫謂水秋風倚樓長笛固未能挹司
倉渭南一勺之細又安敢望李杜之波瀾哉區區之
心伏惟左右憐其憔悴之餘無它好而已

代賀方回請見書

某聞古之士方其竒窮瑣賤未遇之時或東書囊糧
周行四方跋山涉水冒犯霜露固非去墳墓之國而
樂佗邦舍安佚而好遠遊也將欲覽天下之風俗交

天下之賢士大夫收其聞見議論之益去其卑污固
陋之弊以自成其所志者不得不然耳與夫抱殘編
屏窮巷偃倭蹙縮端坐則面牆舉頭則礙屋幽憂沉
寂志棄而氣促區區擬拾古人之腐餘與兒女子語
欲望遭時而立功名者亦可鄙矣孔子曰父母在不
遠遊必有方此右之士未嘗不遊也昔司馬遷二
十而南遊江淮上會稽探禹穴窺九疑浮湘沅北涉
汶泗誦業齊魯之都觀射邠嶧過梁楚以歸若夫高
山大川名都沃壤物產之蕃美士人之豪秀固已洽
聞多識而昭轍乎胷中矣然後辨論古今馳騁千載

之上下著書以名後世此有志者所為也其不肖生質孱懦未能強立而竊有志焉感慨先王之餘風想聞士大夫之高義惟恐身不及見而見之且不多也間者南遊梁宋東走邳魯還過於滕、右侯國也山林深茂氣俗淳重宜有賢者為政于此某一至境上而閣下之休問溢於民言喜躍不自勝以幸其及見輒有請于執事者願一識風采而服其緒綸惟閣下受之而已

代四兄求舉書

某聞萬金之賈陸駕大車川浮巨舶南窮甌越北極

胡漠龍皮象齒文犀紫貝夜光之珠照乘之玉一旦得之則深居大第拱手待價通候巨室先之以將命繼之以飲餼以幸一閱方床大案籍以藻綉大僕挾扶逡巡而進葦匱十重綺囊十襲整襟濯手而後發照爛錯落神動心悸徐問其價則以千言萬以萬言億下酬之則勃然作色中酬之則掩口而笑上酬之則踴躍不歆而後應蓋所得者重則所予者不欲輕故也販婦販夫六十棗栗水捉螺虻足較指秃暴露風雨罄其力不過一釣之舉計其價僅足一日之食正晝過市欲人問之而未嘗顧也日暮入散鷄棲于

時豚蹄於筮突未及薪釜未及粟其色焦然揭之則
屢用弃之則可惜皇皇扣人之門戶幾何不悲吟行
乞矣此其意何也所養者薄而所售者急也蹈道之
士被褐懷玉志足以輕王公氣足以驕富貴致恭尽
礼則見之誠親心合則交之非其徒招之不來非其
義就之不見嘗恐山之不深林之不幽世俗之人將
逐其後也又何嘗以伴通之綸五斗之粟折腰下邑
蹶于人眉睫間哉若夫道不足以任已才不足以
驚世其志懦而卑其器拘以迫使之効一鄉任一官
經趨疾作以應期會指呼不知勞訶叱不知辱如轅

下駒頽一束芻垂頭塞耳不憚鞭箠當是時又何暇
議高節卓行矯激自負哉雖悲吟行乞亦所不恤也
某生質頑味讀書二十年三試不第脫從蔭補得官
不邛碌、獲佐大邑生齒繁浩薄檄填委勾考之詳
出納之吝日夜砥礪計功補過苟免罪負中心所幸
者一薦狀耳薦狀所願者一縣令耳今則已踰兩考
未能如格擢、引睇于門下者日夕以之終亦不敢
以鉗結自廢也恭惟閣下道德在躬仁恕成物屬部
之吏洗滌出塵泥而脫枯槁者固已多矣以某不才
何以與此然而竹頭木屑無間于大匠之手牛溲馬

勃不弁於良醫之門此其之心猶有待也昔者莊子
舍於故人之家故人命孺子殺鴈而烹之孺子曰其
一能鳴者夫能鳴者則矯翼而飛不能鳴者則合喙
而死如是則某今日之言不得不聞于左右也伏惟
閣下貸其僭易憐其幾成出一手而挈之糜身之報
不敢為衆人後伏惟聰明亮察幸甚幸甚

樂靜先生李公文集卷第十一

樂靜先生李公文集卷第十二

表十三

鉅野李昭玘字成季

賀太皇太后生辰表

賀皇帝即位表

賀太皇太后表

進奉賀皇帝登寶位上絹表

謝告諭表

賀冊皇太后表

賀冊皇太妃表

進貢綾表

賀興龍節表

慰皇帝表

慰太皇太后表

賀玉璽表

賀元符改元表

賀太皇太后生辰表

候屬西成屆金方之正氣時生上聖配天德之鴻休
声文所臨舞蹈同底中謝恭惟 太皇太后陛下母
儀恭肅坤德靜柔弼成求圖休有顯烈三光明而四
時節九功叙而百度熙恢其業於無垠躋民物于交

泰文武之興周道華胥之贊軒圖連是芳風曼超治
古臣守職藩佐叨榮聖時觴獻萬年莫預造庭之列
心肩一節徒傾就日之誠宜益介於延洪度克符於
頌祝云云

賀皇帝即位表

臣某言伏奉三月五日詔書恭承 皇帝陛下虔奉寶
圖踐登宸極震雷一發声赫四方大明維升光被萬
國生灵鼓舞動植昭蘇凡在撫臨無不欣戴中謝臣
聞盛德之後世有天下有道之國篤生聖人恭惟
陛下席六帝之洪休對三靈之丕眷仁孝純乎天至

聰明茂於日躋岐嶷之間已能動悟先帝號令之始
足以慰悅衆心社稷有所憑依神祇以之安樂皇天
右序復開命武之符率土祇驩行見紹堯之化臣限
拘符守阻造闕庭無任抃蹈踴之至

賀太皇太后表

伏承太皇太后誕膺宝冊同攬乾綱号越常尊礼隆
無上孝慈交感遐迩祇歡中謝恭惟 太皇太后陛
下柔順在躬聰明齊聖輔佐英帝肅陰教于六宮保
鞠先朝端母儀于萬國載加盛典允荅徽音挾日以
升均照臨于南面與天同久擁康樂于西朝臣限守

藩符不獲趨詣闕庭無任瞻天望聖舞抃激切之至
進奉賀皇帝登寶位上絹表

大人繼明神協祇相四方來賀玉帛交馳仰罄惟心
畢輸邦物臣猥叨符守阻觀帝閣敢陳在籩之儀少
助充庭之實

謝告諭表

伏蒙聖慈特降勅書告諭臣即時集官吏軍員將校
僧道百姓等宣讀訖睿智纂圖深恤艱難之託邇遐
聽命載銜撫育之恩中謝恭惟皇帝陛下純孝在躬
至仁感物奉時昭考將圖天下之安咨爾庶邦使知王

者之志臣猥叨符守誕布德音坐食見克盡識宅宗
之念謳歌歸啟共迎極治之期臣無任瞻天望聖感
戴切激之至

賀冊皇太后表

伏承皇太后允膺寶冊增奉鴻名大孝隆親事光墳
史萬邦蒙福喜極人神中謝恭惟 皇太后陛下育粹
坤元服勤陰教輔佐先帝志在靜柔保鞠聖躬德惟
均一式彰懿範推講盛議祇答懿慈盡明王之要道
誕敷徽命鼓百姓之歡心臣限守著符不獲躬詣闕
庭

賀冊皇太妃表

伏承皇太妃誕膺徽冊增奉隆名凡在途遐孰不抃
蹈中謝恭惟 皇太妃陛下度傳貴緒瑞發靈源率嬪
御以靜柔奉蘋蘩而蠲潔屬真人之續紹推盛典以
褒崇懽動宮闈事先史冊臣_限均藩守阻造闈庭無任
抃蹈激切之至

進貢綾表

禹分九州均節諸侯之貢周建太府校登天下之財
入之必以其時制則各從所有方帝仁之愛養滋物
產于盛多追講舊經畢修常獻臣猥叨符守獲奉歲
輸敢陳在篚之儀以助克庭之實

賀興龍節表

四序周而在朔方成一歲之功二陽進以為臨允叶
大君之吉篤生真主奄有庶邦紹六帝之休光惟兩
宮之孝養車書所暨舞蹈攸均中謝恭惟 皇帝陛下
聰明日蹈智勇天錫應千齡而出震操大器以乘乾
帟嘯龍翔共覩聖人之作風行雷動坐躋萬國之寧
衆賢躋之在朝至化新之而美俗三灵助順六氣
薦和人情胥悅于謳歌天祐胥來于福祿將窮冬律
俯屬誕期載瞻虹渚之祥竊効封人之祝恭默想思
道允懷上帝之心安樂延年水邁南山之壽臣限拘

符守阻造闔庭

云云

慰皇帝表

今日日神宗皇帝小祥者渭水衣冠想神明之如在
石門霜露驚日月之難留中謝恭惟大行^皇帝澤被生民
道躋曠古收成功於六閏垂鴻業於萬年敬窮海上
之山遽厭人間之世言未忘於在耳歲已換於終星
皇帝陛下孝極亡念深^事率考尽憂勤而績禹感冥
漠以見堯禹^惟練服之將更結聖衷而永恋昊天罔
極春露既濡雖哀不可忘頌奄經于時變而禮當有
節庶下慰于人情臣限守藩符不獲 云云

慰太皇太后表

日月變遷人神感惻中謝愛深母道慘結聖衷覲少
順于天時庶下安于人欲

賀玉璽表

大明當宁百避造朝翼緒案以前登金箱而跪進
靈光煥燿虹氣屬天妙刻蜿蜒龍文照日作乾安之
樂奉天子之觴誕布宥恩敬謝宗廟度流海宇騷動
人神實曠古所未聞且四方之來賀中謝竊以明德在
御嘉應並臻蓋天將有示于人故地亦不愛其實至
神變化非意所知和氣薰蒸為時而出惟珍符之肇

見錫景命以來崇眷懷本自於帝心追琢疑非其世
造學者之辨無以稽諸史玉人之巧莫能喻其工不
必論前世之所遺要非偶聖人而不受恭惟 皇帝
陛下仁考率考嚴恭事天朝廷治而庶官脩陰陽和
而五穀熟百神協相四表又安宜保無疆之休以稱
甚盛之德灵芝朱草非難致之物神鼎丹旣不足効
其祥非假秘文孰昭休貺昔堯享封人之祝漢聞嵩
岳之呼會未若躬承受命之符水為守國之器聖作
明述方啟佑於千齡史書樂歌將有辭于萬世

賀元符改元表

准 勅自紹聖五年六月朔已後改為元符元年神
休咎至昭示聖時歲号更新欽承天意布宣萬國鼓
舞群情中謝恭惟 皇帝陛下 一德感通三灵眷佑諸
福之應緣類而來明照下土則神光燭天澤潤生民
則甘露如雨欲付以享邦之慶又申之受命之符皆
前世所罕聞不踰時而來上載諸簡冊播之聲詩猶
未足著無窮之傳復何以表非常之貺大將詔世宜
重紀元太史編年無愧祖宗之美明堂頒曆永同天
地之期

樂靜先生李公文集卷第十二

樂靜先生李公文集卷第十三

表十一

鉅野李昭玘字成季

賀皇帝即位表

賀生皇太子表

謝永興路提刑到任表

謝京東西路提刑到任表

謝移京東東路提刑到任表

知滄州謝上表

謝落秘閣校理表

謝降授承議鄮表

謝復官表

謝出籍表

謝八寶赦轉官表

賀 皇帝即位表

臣某言正月十六日准進奏院遞到制書 皇帝登寶位者龍德時升紹一王之休運天息下霈鼓萬國之歡心允在蓋容一歸撫御中謝竊以可托天下必允屬于真人克享帝心實有懷于明德恭惟 皇帝陛下聰明齊聖歷數在躬孝悌感于人神言行動乎天地奉兩宮而無間就外傳而弗煩道學生知德心

日邁宜先王之眷命付大器以受民二聖嗣興益隆乎世祚一道相授蓋篤于天倫謳歌朝覲之有歸禮樂正刑之具在享七世崇高之業應萬年熙洽之期繼躋元豐均是吾君之子承華紹聖載安百姓之心永孚四海之休咸賴一人之慶臣限拘官守阻造闕庭臣無任

賀生皇太子表

臣某言伏覩進奏院報今日八月八日降誕皇子者太史觀天已識前星之應大人占夢果符男子之祥喜溢宮闈慶均海宇中謝竊以誕彌厥月有開后稷之先

則百斯男子顯文王之盛由人神之相與荷福祿之
無窮恭惟 皇帝陛下孝安祖宗仁遂動植疏爵賞
以繼功臣之臣發廩庾以惠天民之窮廣大德以好
生示神武之不殺萬事咸理允格丕平四夷皆來實
獲多助三辰照鑒六聖具依載錫洪休篤生元嗣至
誠能動無待薦高禩之牲流澤有源何煩種北宇之
行况乃岱祗見象渦聖呈光共扶萬世之基來兆一
人之慶岐嶷之性先自得于神靈聰明之資將弗煩
于師博大本有系衆情以熙臣猥服外僚親逢盛事
工南山之壽阻預班聯誦螽斯之章莫知鼓舞臣
無任

謝永興路提刑到任表

從事府僚訖無善狀詳刑陝部遽忝誤恩祇命入疆
撫躬失次中謝伏念臣學非知與才不逮中晚綴辭科
濫登任版猶未棄詩書之習初不更州縣之勞諱藝
泮宮無以應諸生之問校文芸閣莫能窮未見之書
朝廷勸農之甚優事業空疎而幾廢低徊末路慚負
盛時未嘗赫々以動人姑幸循々而寡過勉從吏責
出佐藩方甫及再朞而還寢遷大伊之佐願浩穰之
多責益黽勉以自持實有愧于吏能偶遂逃於官謗
屬以田廬蕪沒兄弟凋零孤窮不收嫁娶未畢事君

之義固內外以一心在臣之私有出處之異勢屢殫
愚懇過覬便州豈謂天德能聽而弗違日雖幽而必
照不加以罪曲尽其情特優假於使華俾分持于邦憲
量材非稱冒寵若驚况閩中之奧區為天下之劇部
廣輪者三千里襟帶者十八州氣俗喜爭動成抵冒
小林多阻易致奪攘必得通明之才以均察治之寄
如臣煩閣遇事闊疎雖知任大而尽心尤恐力微而
敗責此蓋伏遇 皇帝陛下性齊舜哲政邁湯仁表
德禮以示人亶誠而格物將使路遺不顧人有夷齊
之心田畔相推家成虞芮之俗臣敢不仰思欽恤

俯務靜安閑于無事之間衡以至公之聽鄉隣不擾
狂獄無留誓殫夙夕之勤力圖毛米之効澄清之望
非敢望于古人忠厚之風期少禔于聖治臣無任

謝京東西路提刑到任表

詳刑陝右已乏事功易部畿東再叨恩旨量材非稱
戴寵若驚中謝賦性迂疎聞道蹇淺沾濡薄祿游泳聖
時學文未去其陳言從吏不聞于善狀亦嘗陪書林
之豪秀侏天府之浩繁必有可觀未始錚錚而驚世
竟無他異但能碌碌以同塵屢懇便州遽分煩使事
滋多而智窘責已重而心危勵志竭精知蠢愚之無

補累日易曰頌罪戾之益深久玷官聯生縻廩給方
申前請復禪就遷既奔命以戴星徒搖心望日恭惟
京都之近壤連海岱之故區生靈寔繁獄訟推冗豈
茲孱緩可使澄清攬轡登車慙非任使過家上塚預
有光荣此蓋伏遇 皇帝陛下克性自天舜功成物
措世于中和之地道民于禮義之風將使四海為家
有外戶之不閉群生咸遂無一夫之向隅臣濫總刑
章恭承德意敢不究心審閱先事禁防寬猛以和上
下無擾勉立消塵之効仰酬覆載之恩

謝移京東東路提刑到任表

承之再暮訖無禪報易官東部尚玷恩榮循省已還
兢凌失措伏念臣學非稽古才不過人晚登仕版之
榮寢通朝藉之貴兩叨持節三見周星疾病相仍安
恤陰陽之患精神俱耗言犬馬之勞多慮近迭積憂
成畏姑幸屏心而遠罪未嘗飾智以近名審閱獄辭
唯恐失好生之意芟除偷黨庶幾移瘴惡之風簡屬
年穀順成生民咸遂桴鼓之驚幾息拊揚之繫亦稀
皆神明之化陶成非奔走之臣能預方將束裝待罪
指日言歸豈謂寬恩復更華使去長安之日雖違千
里之園望岱宗之雲猶均一雨之潤文書有報復之

速吏卒無將近之勞昔乃吾隣盡為屬郡今雖別部
曾是故僚顧如此之便安實非臣之覬望而况全齊
大國頻海輿區木極魚鹽之饒陸多桑柘之美大姓
挾賢而犯法細民禦貨以為姦非有強明之才孰分
察治之寄自惟迂暗難稱使令此蓋 皇帝陛下憲
天聰明躡道變化紹復先生之政圖終寧考之功御
一世之英豪納四方于仁壽夫何微品亦備下僚謂
臣無它已嘗試之任使察臣寡過猶將責以事功蓋
天地至大而無私日月雖幽而必照敢不勉脩官責
祇奉憲條察辭于嗟庶不愆于明御除惡務奉使無

害并善柔誓有補于消塵期少酬于覆載

知滄州謝 上表

禮官失職耳俟嚴誅邊壘析符尚叨優寄以不可貸
之罪蒙非所望之恩驚魂既還零涕無已中謝伏念臣
迂踈無取選輒不持惟知任物以直情不善周身而
避患每事必問已失仲尼之前知三思乃行終違文
子之常誠一昨奉太母因山之制謹百官趨事之期
夙有司存各以類舉逮壽官之易奠道虞主以告行
竟達空函幾敗乃事既身為之官守反自闕于禮文
仰誤神灵之依中櫻仁孝之感過莫大者誰其歸之

固當戮于市朝可復付之民社眷浮陽之封壤控北
虜之喉襟澤浸際天雖牛馬之弗及風声屬耳實鷄
犬之相聞宜得望人以壯方面敦詩閱禮鎮以靜安
緩帶輕裘應之閑暇况乃大河泛溢之後一方饑窘
之餘必先謹養以惠和尤在周知其疾苦如臣孱暗
非所克堪此蓋伏遇 皇帝陛下天地同仁日月齊
照澤及行葦每思視物以如傷網漏吞舟不忍向隅
之独泣聊拂官而示罰猶守此以長人敢不砥節奉
公肅心悔過盡為臣之道于事無難惟在愛國之心以
民為本誓殫夙夜少補毫分願海如瀾宛隔蓬丘之

望與頭見日長存魏闈之心臣無任

謝落秘閣校理表

備校讎之列久玷寵名委按察之權尚叨華使退慚
僥倖復荷矜存聞命已還省躬知惧中謝 伏念臣學
術淺鮮器識拘踈偶中詞科濫登文館日見群書之
浩博坐逃俗吏之紛囂物或黨來初怠若驚之戒義
難苟得每懷非據之憂何敢取容屢嘗求解逮俯從
于外補猶竊假于前稱不自請陳寢成冒昧索驪珠
於魚目已失諸真衣羊質以帛皮終非其有宜循名
實無紊故常曲被寬恩上還虛授此蓋 皇帝陛下

紹隆先烈總挾百工予奪必尽其公各從分守內外
一歸乎正無忝司存亶克智以知人博舜仁而愛物
養之廉耻收以事功臣敢不敏激愚衷益勤吏責天
地之造難補報于生成犬馬之軀誓糜捐于驅策臣
無任

謝降授承議郎表

臣某言八月二十二日都進奏院遞到告一道特降
授承議郎差遺勳賜如故臣尋跪授訖禮官被黜方
在退思勅局示懲止從薄責重千文憲疊負釁玃撫
已懷慙感恩零涕中謝伏念臣斷、不敏碌、何知

初無竒誓以動人每以疎愚而取禍詩禮之訓幼則
嘗聞刑名之書素所未學禡預都司之進擢適當常
憲之變更宰府付以官僚惟命所赴法吏摘其命尾
謂可則書文既失于舊章罪寧逃於顯戮止從貶秩
尚玷承流雖天地無所不容而犬馬何以為報此蓋
伏遇 皇帝陛下聰明睿智以獨斷慶賀刑威之必
行遵制揚功永懷善繼亂名改作先務謹誅謂使人
知過則能盡其忠故用罰以寬而終歸于恕臣敢不
省身夙夜砥節事功知無不為庶竭事君之義死而
後已益堅報國之心

謝復官表

天地既交，遠契施生之序。雷雨方作，悉霑蕩之恩。歸復官資，洗除罪戾。莫知手舞，但極涕零。中謝伏念：臣材非過人，學不知道。濫登仕版，誤置書林。必有可觀，未始錚錚。而驚世終無他異，但能碌碌，以同塵。躡省闈，遽忝宰屬。偶官僚之有請，謂國憲之當更。初無預于誦論，漫不思其抵謬。罪同破律，議在謹誅。止錫階秩之微，聊殿籍書之末。豈謂矜前車之既失，開局步于自新。所澤納汙一歸曠度，父母愛子，皆出至情。此蓋皇帝陛下克性生知，舜聰遠格，庶事憂勤。而協帝小心，寅畏以事天。常善救人，恐匹夫之失所。為能盡物期，視以同仁。曾是孤生，亦蒙聖澤，併還舊物。復領真祠，官守不出于田戶家。食盡資于廩粟，葵藿之心常在。終幸照臨，犬馬之力已衰。空慚蓂莢，養一無裨報。獨負生成，雖已寢于桑榆。願未填于溝壑，猶能中田繫壤。日陪野老之教，聲清夜焚香。每効封人之善祝。

謝出籍表

滌瑕蕩穢，共承雨露之霑。需振以彈冠，莫知手足之拮据。惟前日感涕厚恩，中謝伏念。臣生也有時仕宦。

而無學智識非遠議論甚早每慚事往而知非不悟
才疎而多累兩干吏議三巧宮祠額白不可以違河
猶叨豢養唯弊或堪於裹馬未即弃捐間者上帝降
康大祇薦瑞脩成宝刻均福蒸民敢期負釁之餘生
亦預竄名于載藉此蓋伏遇 皇帝陛下愛人無已
視物如傷賞罰之公時乃天道予奪之節本于人情
謂法以示懲既屢更其歲月過而必改誰將自棄于
君親曲示正蒙一從湔拭而臣計功無取蹈悔良多
載肖始終莫斷萬一蓋嘗喻父老以戴上之美意教
子弟以事君之小心長歌天保之六章百拜封人之
三祝雲天在望但知傾日以為心溝壑未填尚冀殺
身而報國

謝八寶赦轉官表

甫除罪藉遽進文階望遠雲天特預一時之澤光生
簪紱如非前日之身寵至若驚感深成涕中謝伏念
臣材猶社木性實絙人初非可用于時終有自貽之
悔間屬禮陳八寶慶洽萬邦赦其既往之愆開以從
新之路雪霜制物天將使之成材鞭朴御家父終無
有棄子矜憐舊物安養殘年復陪多士之步趨再奉
真祠之洒掃已踰望表仍玷序遷未聞圖報之一端

併荷流恩之三錫此蓋伏遇 皇帝陛下大道善貸
至仁無親凡百姓皆得其心靡一物不遂其性聖功
丕冒瑞應並臻嘉與庶工共承多福而臣遇緣幸會
濫服寵休遽蒙璆既容可錄支離受粟尤愧無功
敢不誦明訓以刺肌披愚衷而指日儻萬分之有補
九死如歸以



